


NKÓKO ABRAHAM

 Buku ya Genese lisusu, mokapo ya 22, kobanda na molongo ya 15, mpe tolingi sikawa koloba mwa moke mpe kobanda mosala yango. Genese 22, kobanda na molongo ya 15.

Mwanje na Yawe alobaki na Abalayama mbala na mibale longwa na likoló ete,

Yawe alobi ete, nasili kokata ndai na nkombo na ngai mpenja, mpo ete osili kosala oyo, mpe oboyi kopesa mwana na yo te, mwana na yo na likinda:

Nakopambola yo solo mpe nakofulukisa bana na yo lokola mióto na likoló, mpe lokola bazélo oyo ezalaka na libóngo na mbu; bana na yo bakobotola bikuke ya monguna na bango;

Mabota yonso na nse bakopambolama mpo na bana na yo; mpo ete yo osili kotosa mongongo na ngai.

² Oyo elaka mpenza, likoló na botosi! Botosi ezali nde oyo Nzambe alingaka. Elobamá kala ete: “Botosi eleki mbeka.” Kotosa Nkolo eleki mbeka nyonso oyo okoki kopesa.

³ Tozali kolobela likambo moko ya motuya mingi, na mpokwa oyo, *Nkóko Abraham*, oyo azalaki kobengama “tata na Kondima,” mpo Nzambe apesáká ye elaka ya kosangola mabelé, ye ná Momboto na ye. Mpe na nzela na Abraham nde biso, wana tokufi kati na Klisto, tokómi Momboto ya Abraham mpe tozali basangoli na libula elongo ná Ye, kokokana na elaka.

⁴ Sikawa, Abraham azalaki moto lokola bato nyonso, azalaki moto ya ndenge mosusu te. Nzambe abengaki ye te, ekomami na esika moko te, kino ntango akomaki na mibu ntuku nsambo na mitano. Mwasi na ye, oyo azalaki leki na ye, tóloba, akómaki na mibu ntuku motoba na mitano na ntango yango, ntango mosusu babikaki elongo uta bolenge na bango mpenza. Mpe ye mwasi azalaki ekomba, azalaki na bana te. Nzambe asengaki bokabwani na mobimba, mpo na kokabwana na bato mosusu ya mokili mobimba, na libota na ye mobimba, mpe na bandeko na ye nyonso. Ezalaki na likambo moko ya ndenge mosusu oyo asengelaki kosala.

⁵ Mpe soki Nzambe asengi yo kosala likambo moko ya ndenge mosusu, Asengaka bokabwani na mobimba longwa na ntembe nyonso. Osengeli kokóma na botosi na mobimba, kotosa oyo Alobi. Nzambe asengaka yango. Okoki kosala yango ndenge mosusu te. Mpe, sikawa, Apesaka ntango nyonso ndakisa, mpe yango nde ezalaki ndakisa na Ye, ya bokabwani mobimba na libota na ye mobimba, na bandeko na ye nyonso, mpe bongo

na bongo, mpo na kobikela bomoi oyo etiami pembeni mpo na Nzambe.

⁶ Mibu elekaki, eloko moko esalemaki te, kasi ata bongo Abraham atelemaki ngwi. Alembaki nzoto te. “Atengátengaki ata moke te na bilaka na Nzambe na kozanga kondima, kasi akómaki na makasi, kopesáká nkembo na Nzambe.”

⁷ Mobu na mobu, wana ezalaki koleka, na ntembe te, batioli mingi bazalaki koya koloba: “Abraham, tata ya mabota, okómi na bana boni sikawa?” Yango eningisaki ye te. Ná mwana te, mpe Sara asilaki koleka eleko ya bomoi, ya kokumba zemi, na ntembe te, asilaki koleka ménopause kala, kasi ata bongo, Abraham azalaki kondimela Nzambe kaka ndenge moko. Azalaki komilengela mpo na bebe yango, mpamba te ayebaki mpe andimisamaki na mobimba ete Nzambe akokaki kopesa elaka moko te, soki Azalaki na monene oyo esengeli te mpo na kokokisa yango.

⁸ Momboto na ye esengeli kokanisa ndenge moko. Ata soki yango emonani lokola ezali solo te, lolenge boni ezali komonana na motindo te, na makanisi ya bomoto, ata bongo Nzambe akoki kopesa elaka moko te oyo Ye azali na monene oyo esengeli te mpo na kobatela yango. Bisó tondimi likambo yango moko lelo. Momboto ya Abraham nyonso ya solosolo andimaka likambo yango moko. Ata makambo ya ndenge nini ekómeli biso, ata boyebi boni biso tobakisi, makambo boni esalemaki, lolenge nini yango ezali na motindo te, na makanisi ya bomoto, kútu, ata ezali bolema ndenge nini na makanisi ya bomoto, yango ekosala bokeseni ata moko te. Soki Nzambe nde alobaki bongo, esili. Mpe Momboto na Abraham efandaka likoló na YANGO ELOBI NKOLO. Yango ekati likambo.

⁹ Tomoni ete, nsima na mibu ntuku mibale na mitano, azalaki na mwana te. Kasi Nzambe azalaki kaka sembo mpo na kokokisa elaka na Ye epai na Abraham, mpo Abraham andimelaki Nzambe. Mwana mobali moke yango abotamaki, Isaka moke.

¹⁰ Bongo, nsima na Isaka moke kobotama, na nsima tomoni ete Nzambe apesaki ye mimekano mibale. Alobaki: “Mwana oyo. . .” Nsina na kokóma pene na mibu mokama na zomi na mitano, to ntuku mibale, ye Abraham. Alobaki: “Nalingi ete ózua mwana na yo bobele moko oyo, memá ye na ngomba oyo Nakolakisa yo, mpe kaba ye kuna likoló, na ngomba yango, lokola mbeka.” Na elobeli mosusu, boma ndangá nyonso oyo azalaki na yango, oyo ezalaki kotalisa ete elaka yango ekokokisama. Elingi koloba kolongola biloko nyonso oyo ezalaki komonana.

¹¹ Mpe Abraham alobaki: “Nazuaki ye lokola moto oyo auti na bakufi. Mpe nandimisami mpenza ete Azali na makoki ya kosekwisa ye longwa na bakufi.”

¹² Wana nde libota sikawa Momboto ya Abraham, mpo Asekwisaki biso longwa na bakufi. Tokufaki kati na masumu ná mabe. Mpe Ye Oyo azalaki na makoki ya kobongola molimo na ngai, ya kobongola makanisi na ngai, ya kobongola ezaleli na ngai, ya kobongola ngai na mobimba, Akoki kosala ndenge Alingi. Nyonso oyo Alobaka, nandimaka ete ezali Solo, mpe Momboto nyonso ya Abraham andimaka likambo yango moko.

¹³ Abraham azangaki kotosa Nzambe te, azuaki mwana mobali ya moke yango. Mpe na ntongo yango, alobaki na basali na ye: “Bózela awa elongo na bambalata-mpunda. Ngai ná mwana tokokende mosika kuna kosambela, ngai ná ye tokozonga.” Oh, akosala yango ndenge nini? Wana azali komata likoló na ngomba, mpo na koboma mwana na ye moko, kasi alobi: “Mwana, ngai ná elenge mobali tokozonga.” Ayebaki ete likambo moko esengelaki kosalema. Mpe ayebaki na ye te lolenge oyo Nzambe akosala yango; wana ezali likambo na ye te. Ayebi ete Nzambe alakaki yango.

¹⁴ Yango nde nyonso oyo tozali na mposa ya koyeba, Nzambe alakaki yango! Ekosalema ndenge nini? Nnga nayebi te. Kasi Nzambe alobaki bongo! Akotinda Yesu Klisto, mbala ya mibale, Akoya na lolenge ya nzoto. Akozua baoyo ya Ye Moko. Mibu nkóto moko ekoya, bokonzi ya mibu nkóto na mabelé oyo, elongo na Ye, ná basíkolami. Yango nde oyo Alakaki, mpe tozali kozela ngonga yango kokóma.

¹⁵ Alakaki kobikisa babeli, kosekwisa bakufi, kobengana milimo mabe. Alakaki kosala yango. Azali ndenge moko lobi, lelo mpe libela. Ndenge nini? Nayebi te. Alakaki kosala yango! Bisó tondimi yango; yango ekati likambo. Ntango moto andimi Nzambe, andimi nyonso oyo Ye alobi.

¹⁶ Lolenge wana nde Abraham andimelaki Nzambe. Sikawa, eséngamaki na ye ete áboma ndangá nyonso oyo ekotalisa ete elaka na Ye ekobatelama, kasi andimisamaki ete Nzambe akokaki kosala yango.

¹⁷ Sikawa, Apesaki elaka monene wana kaka na ye te, Apesaki yango mpe na Momboto na ye. Lokola Abraham azalaki sembo, mpe atosaki li—Liloba na Nzambe oyo Nzambe alakaki ye, mpe ayebaki ete Nzambe akokaki kosekwisa mwana yango. Mpe abombaki mwana na ye moko te; kasi (Nzambe) azalaki etaliseli ya Nzambe oyo akopesa Mwana na Ye, na ntembe te; ntango amemaki nkoni likoló na ngomba, mpe nyonso wana; ndenge Klisto, nsima na wana, amemaki ekulusu na Ye Moko ya mbeka, likoló na ngomba, esika Ya abakamaki na ekulusu.

¹⁸ Tomoni ete na oyo, na kosáláká likambo oyo, esepelisaki Nzambe mingi mpenza, komona ete Abraham alingaki Ye koleka makambo nyonso na mokili, koleka ata mwana na ye bobele moko. Alingaki Nzambe koleka oyo moto nyonso akokaki

koloba, oyo moto nyonso akokaki kosala, azalaki kaka kolinga Nzambe ya kokoka mpenza mpo na kondima Liloba na Ye.

¹⁹ Momboto nyonso ya Abraham andimaka Nzambe ndenge wana. Bazali kondima Nzambe. Mpe toyebi ete esepelisaki Nzambe mingi na lolenge ete Alobaki boye: “Momboto na Yo akobótola bikuke ya monguna na ye. Momboto na Yo akobótola bikuke ya monguna na ye.” Bómikanisela, ezali YANGO ELOBI NKOLO. Momboto ya Abraham andimaka yango. Soki ozali Momboto ya solosolo ya Abraham, kondima oyo Abraham azalaki na yango mpo na Nzambe, ezali kati na yo. Mpe ondimi ete oyo Nzambe alobi, Nzambe akokokisa elaka na Ye.

²⁰ Mpe Alobaki bongo, sikawa bómikanisela, Apesaki elaka yango na Abraham kaka nsima na kopesa ye momekano. Momboto ya Abraham asengeli liboso komekama, mpo na koyeba soki andimi mpenza Liloba. Bomikanisela, nzela bobele moko oyo akoki kobatela elaka na Nzambe, ezalaki mpo andimaki elaka ya Nzambe, mpe amekamaki mpo na koyeba soki andimaki Yango to te.

²¹ Tolekaka na momekano yango. Momboto ya Abraham, lelo, ezali koleka na momekano yango. Tokozua nde Liloba na Nzambe, to tokozua oyo moto alobi na ntina na Yango? Tokozua oyo ebongiseli moko boye esali lokola endimeli, mpe kondima yango, to tokozua nde oyo Nzambe alobi? Soki Liloba na Nzambe ezali solo, tokondima Liloba na Nzambe, ata soko eloko mosusu nini ezali. Totikaka ete liloba nyonso ya moto ézala lokuta, mpe oyo ya Nzambe ézala Solo. Momboto ya solo ya Abraham! Kasi liboso ókoka kokóma Momboto ya solo, osengeli koleka na momekano, lokola Abraham ye moko asalaki. Apesaki elaka yango kaka na Abraham te, kasi Momboto na ye akobotola bikuke ya banguna. Oh! la la!

²² Bókanisa naino, ye nkóko andimisamaki na yango mpenza, ntango amekamaki mpo na elaka ya Liloba na Nzambe, ete ezalaki solo. Ata makambo ekómaki ndenge nini, akobaki kondima ete Liloba ezalaki solo. Abraham, nkóko monene, atikalá kotenga-tenga te na kondima, ntango alekaki na ntango ya momekano wana. Andimaki ete Nzambe azalaki na makoki ya kosekwisa ye longwa na bakufi. Andimaki yango, mpamba te Nzambe apesaki elaka yango. Mpe ntango Nzambe apesaki elaka ete akozala “tata ya mabota,” andimaki ete yango ezali bongo. Ayebaki te ndenge nini yango ekosalema. Ntango bebé yango abotamaki, nsima na ye kotia motema, mibu ntuku mibale na mitano, na nsima basengaki ye ete áboma mwana yango, akobaki koyeba ete elaka ya Nzambe ezalaki solo, mpe akabaki mwana na ye.

²³ Momboto na Ye, ndenge moko! Elaka ya Nzambe ezali elembo, epai na baoyo bazali Momboto ya Abraham. Elaka ezali elembo, litatoli ya seleka. Ntango tondimi Liloba nyonso

lilakamaki, na nsima nde elemba epesamelaka biso, mpo na kokisa elaka na nzela na yango. Bomoni, soki biso—soki biso, lokola Momboto ya Abraham, tokoleka na momekano mpo na koyeba soki tokondima Biblia, to te, soki Biblia ezali Liloba na Nzambe, mpo Ezali Nzambe, nsima na koleka na momekano, mpo na kondima.

24 Na ntango bamosusu balobi: “Ntango ya bikamwa esíli koleka,” soki ondimi yango, ekeseni na Liloba.

25 Soki olobi: “Lelo bazuaka lisusu Molimo Mosanto te. Eloko ya ndenge wana ezalaka te. Kaka bantóma zomi na mibale nde bazuaki Yango.”

26 Liloba elobi, Petelo ntango azalaki koteya Yango na Mokolo ya Pantekote, alobaki: “Bóbongola mitema, moko na moko na bino, mpe bóbatisama na Nkombo na Yesu Klisto mpo na bolimbisi ya masumu, mpe bokozua likabo ya Molimo Mosanto. Mpo elaka yango ezali mpo na bino, mpo na bana na bino, ná baoyo bazali mosika, baoyo nyonso Nkolo Nzambe na biso akobenga.”

27 Ezali mpenza oyo Yango elingi koloba. Ezali, sikawa soki obelemi mpo na koleka na momekano, na momekano ya kafukafu ya Nzambe, mpe kolanda malako yango, nalobi na yo, okomona ete Nzambe akokisaka Liloba na Ye, soki yo okondima Yango. Ya solo. Kasi osengeli koleka na yango, mpo yango nde elemba; soki okoki koyamba Yango, na bongo okoyamba elaka. Mpamba te, Ezali malako ya Nzambe, lolenge tosengeli kosala yango, mpe lolenge wana nde tosengeli kolanda Yango, kaka oyo Ye alobaki. Sikawa, ezali kaka mpo na bato moko boye te, kasi mpo na “oyo nyonso,” oyo nyonso andimi, oyo nyonso abongoli motema, oyo nyonso andimi. Ezali mpo na bikeke nyonso, mpo na mabota nyonso, mpo na oyo nyonso alingi kondima Yango. Kondima na Liloba na Nzambe nde ememaka yo na elaka yango. Bongo, mpe kaka bongo nde okoki kozua nguya ya kozua elemba ya elaka yango.

28 Mpe elaka oyo tozui, elemba yango, ezali libatizi ya Molimo Mosanto. Ya solo. Mpamba te wana ezali Nzambe na lolenge ya Molimo, lokola ozali na Liloba na Ye kati na yo, na bongo Akoya kati na yo. Soki oyambi Liloba kati na yo, kaka Molimo Mosanto nde ekoki kopesa Yango bomoi, na nsima na yango ozui elaka ya kobótola ekuke ya monguna nyonso oyo akomeka kobundisa yo. Ya solo. Nzambe alakaki yango, mpe ezali bongo.

29 Sikawa, bobosana te, okoki kosala yango kaka na ntango wana, kaka na ntango wana nde, nsima na yo koleka na komekama ya Liloba.

30 Abraham alekaki na komekama ya Liloba. “Abraham, ondimi ete okobota mwana yango?”

“Iyo.”

31 Mwana yango abotamaki. “Sikawa bomá ye. Ozali kokóba kondima yango, Abraham?”

32 “Nandimi yango, ata bongo, mpo Ozali na makoki ya kosekwisa ye longwa na bakufi.”

33 Nsima na yango, Alobaki: “Sikawa, Momboto na yo akobótola ekuke ya monguna na ye.” Amen! Nsima na koleka na momekano!

34 Tólandela mwa mimboto mosusu ya Abraham, mimboto na mosuni. Oyo, lelo tozali Momboto ya molimo. Kasi totala naino, mimboto mosusu ya nzoto, baoyo bandimaki elaka mobimba ya Nzambe, mpe batikálá te ko- . . . [Maloba mazangi na bande—Mok.]

35 Nalobaki: “Na bongo, ntina nini elenge mwasi Moklisto akoki kolinga kolakisa jupon na ye? Nakoki kososola yango te.”

36 Obotami mbala mibale, na Nzambe, ozali na kitoko ya Molimo Mosanto mpo na kotalisa oyo yo ozali. Ozali, ozali na libongi oyo ba-jupe ya nsoni wana ezali na yango te, ya solo, mwasi ya solosolo, ya Nzambe, oyo azali na libongi, bakoki kotiola yo, mpe kofinga yo osilá ngala; kasi ozali na eloko moko oyo bango bakoki kosimba te, basilá kobúngisa yango mpe bakoki kozua yango lisusu te. Ya solo. Ozali na libongí. Yango nde eloko oyo Nzambe alukaka, libongí. Bomoni?

37 Kasi likambo ya liboso, soki ozali na mwa ntembe na makanisi na yo, komeka kosala yango ata moke te. Komeka koya na molongo ya mabondeli te soki ozali na mwa ntembe na makanisi na yo. Komeka koya te soki ondimi yango mpenza te, na mobimba mpenza, ozali ata na mbóngé moko te na makanisi na yo, ata moke te, kasi ondimi ete okobikisama, na bongo, okolongwa na etumbelo oyo na nzoto kolongonu. Ya solo, soki ozali ata na ntembe moke te na molimo na yo. Osengeli kondima Nzambe, kondima ya maloba te. Kondima mpenza!

38 Mpe Momboto ya Abraham andimaka yango mpo Liloba elobi bongo, yango wana tondimaka yango. Ezali te mpo moto moko alobaki mabe, mpo moto mosusu alobaki bongo. Mpo Nzambe alobaki bongo, yango nde esali ete ézala Solo. Ntango Nzambe alobi yango, elongoli ntembe nyonso. Azali liloba ya nsuka. Azali etemelo ya nsuka. Ntango Nzambe alobi likambo moko, yango ekati likambo. Eloko mosusu te ekoki kotelemela Yango. “Maloba na moto nyonso ézala lokuta, mpe oyo ya Ngai ézala Solo.”

39 Sikawa, wana tozali kolandela mimboto mosusu oyo, tókanisa. Tokanisi na ntina na bana ya Baebele, nakomáki yango awa, wana nazalaki kokanisa na ntina na yango, na bana ya Baebele, nsima na bango komekama mpe koboya kosambela bikeko. Sikawa, bomikanisela, mokonzi alobaki: “Moto nyonso oyo akogumbamela ekeko oyo te, akobwakama na litumbu na móto.” Sikawa, bana yango bazalaki kondima ete Liloba na

Nzambe ezali solo, ete basengelaki kosambela ekeko ata ya lolenge nini te, kasi ntango bakómaki na ntango ya momekano, bamekamaki mpo báyeba soki bakosala yango.

⁴⁰ Na ntango yango, bana mosusu nyonso oyo bazalaki kuna batosaki mpe basambelaki yango, basalaki mpenza ndenge mokonzi alobaki. Balandaki makanisi ya bato mingi ya eleko wana, ete basengelaki kosala yango.

⁴¹ Mpe ntango bamekamaki, mpo na koyeba soki balingaki kosambela bikeko mpe kobuka Liloba na Nzambe, batikalaki sembo na Liloba. Ata makambo yango ekómaki ndenge nini, batikalaki sembo na Liloba. Mpe ntango babwakaki bango na litumbu ya móto, elaka ya Nzambe ekokisamaki. Babotolaki bikuke ya monguna na bango. Mpe Moto ya minei moko azalaki kuna na kati, ná fungóla oyo elongolaka móto na kati ya móto, mpe ekokaki kosala eloko moko te, bobele kokangola bango. Amen.

⁴² Ntango mobali to mwasi abelemaka mpo na koleka na momekano, momekano ya kafulafu!

⁴³ Bomoni, basengelaki kokóta na móto. Na bongo, nsima na yango, bazalaki na kati ya móto, mpe eloko bobele moko oyo esalemaki ezali ete, momekano ya móto yango ekangolaki bango, ekataki ba—basinga na maboko na bango.

⁴⁴ Mbala mingi, Nzambe atikaka biso, ntango mokili ekangaka biso na mobimba, ekangaka mpenza biso, Atikaka ete mimekano ya móto ékómela biso, na bongo tosengeli kozua mokano. Mpe ntango tosali yango, eloko kaka moko oyo momekano yango ekoki kosala, ntango Momboto ya solosolo ya Abraham akómaka na—na matákanelo ya banzela mpo na kozua mokano, mpe azui mokano ya kosalela Nzambe, yango ekoki bobele kokata basinga mpe kopesa biso bonsomí. Satana akoki kopesa yo bokono. Akoki kopesa yo eloko moko to mosusu. Okoyeba ndenge nini soki ezali Nzambe nde atii yo na matákanelo ya banzela, mpo na kotala loléle ya mo—mo—mokano nini okozua?

⁴⁵ Babotolaki ekuke ya móto. Móto ekokaki kozikisa bango te. Ata nsolo ya móto ezuaki bango te, mpamba te bayebaki ete bazalaki Momboto ya Abraham, mpe bazuaki ngámbo ya Nzambe ná Liloba na Ye. Babotolaki bi—bikuke ya monguna, mpe móto ekokaki kozikisa bango te, mpo babotolaki bikuke na yango.

⁴⁶ Nsima na yango, ezalaki na mobali moko, mosakoli moko kuna, nkombo na ye Daniele. Alingaki . . . alekaki na momekano mpo na koyeba soki alingaki kosalela Nzambe bobele moko ya solo, to te. Ntango ngonga yango ekokaki, ya koyeba soki alingaki kosalela Nzambe bobele moko ya solo, to kosambela nzambe ya bapakano, aboyaki kosala yango; azalaki kotombola baridó, mpe kosambela Nzambe na ye, mikolo nyonso. Mpe bakangaki ye mpo na yango, mpe bakatelaki ye etumbu

kokokana na mibeko ya ekólo, mpe babwakaki ye na libulu ya bankosi. Etonga ya bankosi oyo bazalaki na nzala bangulumaki mpe balandaki ye. Asalaki nini? Abótolaki ekuke ya monguna na ye. Bankosi bakokaki kolia ye te. Nzambe atindaki Likonzi na Móto, Mwanje moko azalaki katikati na ye ná bankosi.

⁴⁷ Abótolaki ekuke ya monguna, mpo amekamaki mpo na koyeba soki alingaki kosambela Nzambe bobele moko ya solo, to alingaki kozala na banzambe pene na zomi na mibale ya kosambela. Boye, ayíkaki mpiko na momekano yango, mpe abótolaki ekuke ya monguna. Nkosi akokaki ata komama ye te, mpo Nzambe azalaki na ye. Elaka ya Nzambe atikalaki solo, mpamaba te azalaki Momboto ya solo ya Abraham.

⁴⁸ Mose, oh, moto monene mosusu. Ye mpe amekamaki, mpo na komona elaka oyo Nzambe apesaki ye. “Nakozala elongo na yo ntango okokende kuna.” Mpe ntango azalaki liboso na baoyo bamekolaki likabo na ye, Yane ná Yambele bamekaki kotelema mpo na komekola eloko mpenza oyo Mose atíndamaki kosala. Nzambe nde abengaki ye, mpe ayebaki ete ye moto azuaki etinda ya kosala yango, atelemaki wana mpe asalaki ekamwiseli ndenge Nzambe ayebisaki ye ásala yango. Mpe bamekoli bazalaki wana, mpo na kosala ndenge moko, kasi etungisaki Mose te. Atikalaki sembo na Liloba na Nzambe, mpe abótolaki bikuke yango, amen, ya monguna, mpo atikalaki sembo na elaka ya Nzambe, ata soki nani amekaki komekola yango.

⁴⁹ Ezali liteya monene mpo na Moklisto nyonso! Soki otambwisi miso mpe omoni moto na bilongi mibale, yeba ete azali koluka komekola likambo ya solosolo. Kasi, elakisi bobele ete ezali na moko oyo azali mpenza solosolo. Tikálá sembo na Liloba na Nzambe! Ata eloko nini eyei to ekei, batelá elaka na Ye. Iyo, Daniele atikalaki sembo na Liloba na Nzambe.

⁵⁰ Ata bato boni balukaki komekola ye, ná nyonso mosusu wana, atikalaki sembo. Mpe ayaki na ntina moko, mpo na kobimisa Yisraele na Ezipito, mpe kokotisa bango na mboka ya elaka. Mpe ntango ngonga ya kokóta na mboka ya elaka ekokaki, ya kobima na Ezipito, Mer Morte ekangaki bango nzela. Abótolaki bikuke ya mai yango, mpe bikuke yango efungwamaki mbala moko. Mpe ma—mai ezungaki nsima, mpe Mose amemaki Yisraele kino na lisobe, na ngomba oyo Nzambe apesaki ye etinda ya komema bango. Amen. Abótolaki bikuke ya monguna yango.

⁵¹ Tata na Ye, Abraham, moto azaláká na elaka yango, ete Momboto na ye ya solo akobótola ekuke ya monguna. Kasi bikuke ya mai ekangamaki, mpe akokaki koleka te, kasi yango nde ezalaki nzela ya mosala. Asengelaki komema bana yango na ngomba wana. Nzambe ayebisáká ye ásala bongo. Kasi ekuke yango ekangaki nzela, mpe abótolaki ekuke ya monguna yango.

⁵² Yosua, nsima na mwa ntango, ntango bakómaki na Kades-Barnea, oyo ezalaki kiti ya kosambisa ya mokili na ntango wana,

kuna nde Yisraele akutanaki na kosambisama na ye. Tomoni Yosua ná Kalebe, ná bato zomi na mibale mosusu. . . to—to zomi mosusu. Batindaki moto moko ya libota moko na moko kuna mpo na konóna mboka oyo bango balengelamaki kozua.

⁵³ Kasi ntango bamonaki bingambe minene oyo batelemi kuna, zomi kati na bango bayokaki nsómo mpenza, balobaki: “Tokokoka kozua yango te. Eleki makasi. Ee, bótala bonguna oyo tozui.” Kasi ntango bazongaki mpo na kopesa nsango, bapesaki nsango ya mabe.

⁵⁴ Mpo na nini bapesaki nsango ya mabe, soki Nzambe ayebisaki bango: “Nasili kopesa bino mboka yango; ekómi ya bino?” Ayebisáká bango kuna na Ezipito, ete: “Nasili kopesa bino mboka yango, ezali mboka malamú, ezali kotanga na miliki ná mafuta ya nzoi.”

⁵⁵ Kasi ntango bamonaki ete bonguna ezalaki makasi mingi, zomi kati na bango bazongaki mpe balobaki: “Tokolonga te.”

⁵⁶ Yosua moto akangisaki bato minoko, mpe alobaki: “Tozali na makoki koleka ya kobotola yango. Tozali na makoki koleka!” Mpo na nini? Azalaki kotala elaka. Azalaki Momboto ya solo ya Abraham. Ata bonguna ezalaki ndenge nini: “Tokoki kobotola ekuke yango, mpo Nzambe alakaki biso mboka yango.” Mpe abótolaki ekuke yango.

⁵⁷ Na nsima, ntango amemaki bana ya Yisraele kino na ebale. Ezalaki na sanza ya Minei, ebale monene ezalaki kotonda na mai. Yaladene ezalaki kotiola longwa na bangomba, mpe ezalaki kopanzana kuna na bitando. Emonanaki lokola ezalaki ntango ya mabe mpenza koleka, na kati ya mobu, oyo ye akokaki kozala wana. Kasi, ata bongo, azalaki Momboto ya Abraham. Ayebaki ete azalaki na elaka, mpe azalaki kokokisa mosala esengami na ye. Nzambe apesaki ye emononeli ya ndenge asengelaki kosala, mpe abótolaki bikuke ya ebale yango. Ntango bikuke yango efungwamaki mbala moko, mai ezongaki kino na bangomba. Mpe Yosua ná Yisraele babótolaki bikuke ya monguna yango, bakatisaki mpe bakotaki na mboka ya elaka, mpamba te Nzambe ayebisaki bango ete básala bongo. Momboto ya Solo ya Abraham!

⁵⁸ Bandeko mibali ná bandeko basi, ntango akómaki kuna, Yeliko ezingamaki na bitutu ya milai mingi na lolenge ete bakokaki kotambwisa makalo misato, moko pembeni na mosusu, likoló na yango. Ndenge nini bana ya Yisraele oyo bakokaki kolonga, ná mipanga badefaki to balokotaki, mpe nyonso wana, ná mángenda mpe mabanga, balingaki kokota kuna ndenge nini? Kasi ata bongo, azalaki Momboto ya Abraham. Nzambe apesaki ye emononeli, ayebisaki ye ndenge asengelaki kosala, alobaki: “Bóyula kelelo.” Amen. Yango nde. “Bógánga, bótambola semba kino na etutú yango, bikuke yango ekokweya liboso na bino.” Amen! Azalaki Momboto Mokonzi ya Abraham, azalaki

mondimi ya solosolo ya Nzambe. “Bikuke yango ekokweya liboso na bino. Bóganga kaka, mpe bóyula kelelé. Yango nde nyonso oyo bosengeli kosala.” Mpe likambo nini esalemaki? Bikuke yango ekweyaki, mpe Yosua abotolaki engumba yango.

⁵⁹ Nsima na mwa ntango, tomoni ete banguna bapalanganaki mpe kokima-kima, nsima na wana, mpe atelemisaki ata moi na nzela na yango. Ndenge nalobaki mokolo wana na ntongo na ntina na *Likamwisi*, atelemisaki moi kino ntango abótolaki bikuke ya monguna na ye. Amen. Ayebaki ete soki monguna wana asangani lisusu, bazalaki ya kopalangana, mpe mói ezalaki kolala, mpe Baamola, ná Bamaleki, ná bamosusu, bazalaki ya kopalangana mpenza, soki básangani lisusu, mpe bázongi esika moko, elingaki kokóma mpasi mpo na kopalanganisa bango lisusu. Mpe eloko moko kaka ezalaki kopekisa ye, ezalaki ntango, mpe atelemisaki ntango. Amen! Amen! Eloko moko kaka ekabolaki ye na elaka, ezalaki moi, bozalisami yango moko ezalaki koleka na yango, mpe atelemisaki bozalisami. Mpo na nini? Azalaki Momboto ya Abraham. Andimaki elaka ya Nzambe. Atelemisaki yango, mpe abótolaki bikuke yango. Iyo, misie.

⁶⁰ Bato minene wana, bango nyonso bazali bato minene. Kasi boyebi ntango bango, moko na moko na bango, ntango bakómaki na ekuke ya liwa, bango nyonso bakufaki. Moko na moko na bango asengelaki kokufa. Lokola bazalaki bato minene: “Bakangaki minoko ya ba—bankosi, mpe bakimaki móto, mpe mino ya mopanga,” mpe bongo na bongo, ndenge bayebisi biso na Baebele 11. Mpe babotolaki bikuke ya banguna nyonso, longola kaka monguna moko, mpe yango ezalaki liwa. Liwa emelaki moko na moko na bango.

⁶¹ Bongo mokolo moko, Momboto Mokonzi ya Abraham ayaki, Yesu Klisto, Mwana na Nzambe; Momboto ya Abraham, na nzela na kondima. Na nzela na Isaka te, momboto na nzoto; bango basalaki oyo ya bango. Kasi Moto moko ayaki, Oyo abotamaki lokola bato ya mokili te. Moto moko ayaki, oyo atikálá kobotama na mposa ya nzoto te. Moto moko ayaki, Abotamaki na mongondo. Mwana ya Nzambe, Momboto ya Abraham, oyo ezalaki mpenza Moto monene! Mimboto mosusu nyonso babotamaki na mbotama ya nzoto. Kasi Mobali oyo abotamaki na mbotama ya mongondo. Ntango Ayaki na mokili, Asalaki nini? Alóngaki banguna nyonso oyo Satana azalaki na yango. Alongaki nyonso.

⁶² Asalaki nini? Akendeki kuna mpe Alóngaki bokono. Bokono moko te ekokaki kozala zingazinga na Ye; bisika nyonso bokono ezalaki, Alóngaki yango. Nsima na Ye kolóngá yango, Asalaki nini? Apesaki biso bafungola, amen, kolobáká: “Nyonso oyo bokokanga na mokili, Nakokanga yango na Likoló.” Oh! Amen! Oyo wana nde Momboto Mokonzi ya Abraham, nde elaka na Ye. Molimo Mosanto kati na biso sikawa, ná bafungola,

mpo na kobundisa bokono. Alóngaki bokono. Bokono ekoki kotelema liboso na Bozali na Ye te. Mpe Alobaki ete Apesaki biso bafungola mpo na kosala ndenge moko, kolóngá bokono. “Nyonso oyo bokokanga na mokili, Nakokanga yango na Likoló.”

⁶³ Lisusu, masénginya, Alekaki na masénginya ya ndenge na ndenge lokola biso. Asalaki nini? Alongaki yango. Mpe Alobaki nini na biso? “Bótelemela zabolo, mpe akokima mosika na bino.” Alóngaki bokono mpo na biso. Alóngaki masénginya mpo na biso, Abukaki bikuke; Ye abotolaki fungola epai ya mopesi masénginya, mpe apesaki yango epai ya bandimi, Momboto ya Abraham, mpe alobaki: “Soki apesi bino masénginya, bótelemela ye, mpe akokima mosika na bino.” Oh! la la! Bótelemela ye!

⁶⁴ Alóngaki liwa ná ewelo. Asekwaki na mokolo ya misato, Alobaki: “Nalóngi. Mpe lokola Nazali na bomoi, bino mpe bozali na bomoi.” Oh, oyo mpenza elaka! Ezali mpo na Momboto ya Abraham. Alóngaki nkunda, Asekwaki na mokolo ya misato, mpo na kolóngisama na biso. Ntango Asekwaki, Azalaki kolongisama na biso. Ekómisi biso banini? Alóngaki bokono. Alóngaki liwa. Alóngaki ewelo. Alóngaki nkunda. Alóngaki masénginya. Oh!

⁶⁵ “Sikawa tozali koleka balóngi na nzela na Ye oyo alingaki biso mpe apesi bomoi na Ye mpo na biso,” lokola tozali Momboto Mokonzi ya Abraham. Na Molimo yango moko ya Nzambe kati na biso, oyo ezalaki kati na Ye, tozali koleka balóngi. Bikuke nyonso esilá kolóngama mpo na biso. Eloko bobele moko oyo tosengeli kosala ezali kobotola yango. Esíli kolóngama. Bokono elóngami. Liwa elóngami. Ewelo elóngami. Nkunda elóngami. Nyonso elóngimi, mpe tosimbi bafungola, na ngolu na Ye. Ozali kobanga kokótisa yango na ekangelo, mpe koloba: “Nayei na Nkombo na Yesu Klisto”? “Bósenga nyonso na Tata na Nkombo na Ngai.” Nalingi Ye.

⁶⁶ Nsima na mibu nkóto mibale koleka, mibu nkóto mibale, mpe tala Azali awa kino lelo, katikati na biso, Molóngi na Nguya oyo apasalaki ezipelo na biteni mibale, mpe akamataki bokono nyonso, maladi nyonso, nyonso likoló na Ye moko, mpe amemaki bolembu na biso na ekulusu, mpe bokono na biso ná maláli na biso, mpe alóngaki yango, mpe asekwaki mpo na kolóngisama na biso, mpe azali na bomoi nsima na mibu nkóto mibale, mpo na komitalisa Ye moko lokola Yesu Klisto na bomoi, katikati na Momboto Mokonzi ya Abraham, oyo bazali basangoli ya biloko nyonso. Oh! la la! Baoyo nsima na bango koleka na momekano ya elaka ya Liloba! Soki okoki kondima Liloba, na bongo ozali mpe Momboto ya Abraham. Ndenge wana nde bayaka na likambo Yango.

⁶⁷ Soki okoki koleka na momekano ya Liloba te, bongo oti

Yango ntembe, ozali na mwa ntembe Yango, okoki mpenza kondima Yango te, soki eloko moko to mosusu esali ete ókoki na yo kondima Yango te, na bongo koya na molongo ya mabondeli te. Soki ngai, nakolinga ata kosala maseki te pembeni na etumbelo, soki ozui ngolu oyo ekoki te mpo na koyeba ete Liloba na Nzambe wana ezali solo.

⁶⁸ Mpe soki oleki ezipelo wana ya kozanga kondima, na bongo ozali na bafungola ya liwa, ya ewélo, ná nkunda na maboko na yo, mpamba te ozali na Molóngi Oyo alóngaki mpo na yo. Na bongo ozali na Baebele 13:8, oyo eyebisi biso ete: “Yesu Klisto azali ndenge moko lobi, lelo, mpe libela.” Ndenge nini tokoki kosala yango?

⁶⁹ Lelo, bato balobaka: “Oh, ee, yoka, Azali bongo na—na lolenge moko boye, Azali bongo.”

“Azali ndenge moko,” Biblia elobi bongo.

“Oh, ee, lelo, Asalaka te lelo ndenge Azaláká kosala.”

⁷⁰ Tozali komona yango sikawa, ntango tozali komona Liloba na Ye kokokisama. Esalaka nini? Ebwakelaka bango Yango semba na makolo na bango lisusu. Amen.

⁷¹ Momboto ya solosolo ya Abraham bandimaka Yango. Bayebi Yango. Mpe Azali awa, na mpokwa oyo, ndenge Akutanaki na Abraham kuna, na mikolo ya Lota, mpe Asalaki ekamwiseli wana, ndenge Asalaki na koyebisáká Sara maloba autaki koloba na nsima na Ye. Yesu alakaki na Momboto Mokonzi ya Abraham ete Lingomba ekomona lisusu likambo yango moko liboso na Boyei na Ye. Ezali nini? Esengeli kosalema. Nzambe alakaki yango. Yesu Klisto atitolaki yango mpe alobaki ete ekosalema bongo, mpe biso oyo lelo, nsima na mibu nkóto mibale, tozali komona Ye katikati na biso, Azali Molóngi na Nguya kino lelo! Alongaki liwa, ewélo, nkunda, kisolóka nyonso; Azuaki Liloba . . . ? . . . ye. Iyo.

⁷² Alobaki: “Soki boumeli kati na Ngai, mpe Maloba na Ngai eumeli kati na bino, bósenga oyo bolingi mpe ekopesamela bino.” Ezalaki nini? Liloba, Klisto, nde Azali na motema na yo. “Soki boumeli kati na Ngai, Maloba na Ngai eumeli kati na bino, na bongo bolóngi nyonso, mpo Ngai nde nalongaki yango mpo na bino. Soki boumeli kati na Ngai, soki bokoki kososola Ngai, soki bokoki koumela kati na Ngai. Ye oyo akondimela Ngai, oyo akoyamba Ngai; kondima na maloba mpamba te, kasi koyamba. Ye oyo akoyoka Maloba na Ngai, akososola Maloba na Ngai, mpe akondima Ye oyo atindi Ngai, azali na Bomoi ya seko; mpe akoleka na masénginya te, to akokweisama te, kasi alongwe na kufa mpe ayingeli na Bomoi.” Ye wana, Molongi na Nguya!

⁷³ Ye oyo lelo, Azali ndenge moko lobi, lelo, mpe libela. Ye oyo Azali kosala liboso na Momboto ya Abraham, oyo abengami libanda na Babilone, abengami libanda na Sodoma, abengami libanda na mokili, mpe atiami pembeni, kotalisáká ete elaka

na Ye ezali mpenza solo. Nsima na mibu nkóto mibale, Ye oyo katikati na biso, na mpokwa oyo, Molóngi na Nguya yango, Liloba na Nzambe Oyo akoki kososola makanisi oyo ezali na kati ya motema, mpe bamposa na yango. Ezali nini? “Momboto na Yo akobótola bikuke ya monguna na ye.” Ezali nini? Ezali Momboto ya Abraham, Momboto Mokonzi, azali kondima Liloba. Mpe Liloba ezali—Liloba ezali Nzambe.

⁷⁴ Sikawa ntango tomoni likambo oyo, tokoki koganga elongo na bango, ndenge moyembi ya kala ayembaki:

Na bomoi, Alingaki ngai; na kufa, Abikisaki
ngai;
Na kokundama, Amemaki masúmu na ngai
mosíká;
Na kosékwa, Alóngisáki ngai ofélé mpo na
libélá:
Mokolo moko Azonga—oh, mokolo ya nkembo!

⁷⁵ Moto moko alobaki: “Ozokóma mobange, mwana.” Nakoki kopekisa yango te.

⁷⁶ Nazali na bomoi uta bomwana na ngai, ntina bobele moko oyo natikálá kolanda, ezali ya komona Boyei ya Yesu Klisto. Nakabá bomoi na ngai mpo na ntina yango. Nazali naino na eteyelo, lokola mobangé, nazali kondima Lisolo yango moko, mpe eloko ya monene koleka oyo nakoki kokanisa ezali ete námona Yesu Klisto kokita longwa na likoló mpo na kozua bato na Ye. Nzambe, na bongo ya ngai. . . Kokamwa te ndenge toyembaka:

Biso nyonso tókumisa nguya ya Nkombo na
Yesu!
Tika ete Banje báfukama;
Báya na pauni ya bokonzi,
Mpe bálatisa Ye motóle ya Nkolo na nyonso.

⁷⁷ Mpo na nini? Azali Molóngi na Nguya. Soki ozali kati na Ye, ozali kati na Liloba. Alobaki: “Soki boumeli kati na Ngai, bósenga oyo bolingi.” “Oyo bolingi,” mpo bikuke nyonso esílá kolóngama. Na bongo tokoki koloba:

Mpo bilaka nyonso kati na Buku ezali ya ngai,
Mokapo nyonso, molongo nyonso, nzela
nyonso.
Natii motema na Liloba na Ye ya Bonzambe,
Mpo bilaka nyonso kati na Buku ezali ya ngai.

⁷⁸ Banninga, bozali kososola oyo yango elingi koloba? Bilaka nyonso oyo Nzambe apesaki na Abraham, bilaka nyonso oyo elobamaki na basakoli, bilaka nyonso oyo Yesu Klisto alakaki mpo na mokolo oyo, Azali awa mpo na kokokisa yango mpe kotalisa ete Azali na bomoi libela na libela. “Momboto na Yo akobótola ekuke ya banguna.”

⁷⁹ Ntango ngonga ya liwa ekokoka. Okoloba: “Olobi nini mpo na yango?” Kino wana, ozali na Libula oyo Polo alobelaki. “E nkunda, wapi elonga na yo? E kufa, wapi esweli na yo? Kasi matondi na Nzambe, Oyo apesaka biso elóngá na nzela na Molóngi na Nguya, Yesu Klisto.” Oh!

Tika ete Banje báfukama;
báya na pauni ya bokonzi,
Mpe balatisa Ye motóle ya Nkolo na nyonso.

⁸⁰ Na mpokwa oyo, nsima na mibu nkóto mibale, tozali komona Ye, kino lelo, Molóngi na Nguya Oyo apasolaki ezipelo oyo ezalaki kokabola biso na bilaka nyonso ya Nzambe, mpe tokómi koleka balóngi kati na Ye. Tóbondela.

⁸¹ Tata na Likoló, wana totelemi awa, na mpokwa oyo, na Bozali ya Molimo Mosanto, Moto monene wana Yesu Klisto na lolenge ya Molimo, Oyo alakamaki kokita likoló na Momboto ya Abraham, Momboto Mokonzi, tobondeli, E Nzambe, ete soki mobali to mwasi moko azali awa, elenge mobali to elenge mwasi, oyo ayebi Yo te, baoyo bazali na ntembe mpe na mobúlungano na makanisi na bango, na ntina na Liloba na Nzambe, soki Ezali Solo to te, E Nzambe monene, Oyo apesaki elaka yango, yaka na mpokwa oyo! Opesaki elaka moko monene, Nkolo, Okoki kokokisa elaka yango, Olobaki: “Ye oyo akondimela Ngai, misala mizali Ngai kosala, ye mpe akosala yango; akosala ya minene koleka oyo, mpo Nakei na Tata.” Tata Nzambe, tobondeli ete Ókokisa Liloba na Yo.

⁸² Bana ya Abraham mingi bazali awa na mpokwa oyo, oyo bazali na bokono. Oh, milimo mabe esili kokangela bango; bakangeli bango na kati, mpe bakangi ekuke, mpe alobaki: “Sikawa osengeli kokufa; ozali na mpasi ya motema. Ozali na *oyo, oyo kuna*, to *oyo mosusu*, mpe osengeli kokufa.”

⁸³ E Nzambe, tika ete kelelo ya yubilé ya Nsango-malamu éyúla, na mpokwa oyo, mpo moómbó nyonso ázua bonsomi! Yesu Klisto asili kolóngá bikuke yango. Tosimbi bafungola na yango na maboko na biso. Oh! “Na Nkombo na Ngai bakobengana milimo mabe. Soki bosengi na Tata eloko moko na Nkombo na Ngai, Nakosala yango. Ye oyo akondimela Ngai, misala oyo Nazali kosala, ye mpe akosala yango. Liloba na Nzambe ezali na mopotu mpe na nguya koleka mopanga ya mino mibale, etobolaka kino kokabola matongá ná mafuta na yango, mpe esósolaka ata makanisi oyo ezali na kati ya motema.”

⁸⁴ “Mpe ndenge ezalaki na ntango ya Noa, ekozala mpe bongo na boyei ya Mwana na moto, mpo bazalaki kolia, komela, kobala, kobalisa bana na bango; miango minene ya botongi.” Mpe tozali kotala mokili malamú: “Bilembo ná makambo ya nsómo ekomonana na likoló (ezali ba-soucoupe volante), koningana ya mabelé na bisika ndenge na ndenge, konguluma ya mbu (mbonge

minene), mitema ya bato ekokangama (na nsómo), mawa katikati na bikólo, ntango oyo bato bayebi te básala nini.”

⁸⁵ “Mpe ndenge esalemaki na ntango ya Lota, ekosalema mpe bongo na boyei ya Mwana na moto.” E Nzambe, yaka kokokisa Liloba na Yo na mpokwa oyo, yaka koyanola na kondima ya bana ya Abraham na mpokwa oyo. Tosengi yango na Nkombo na Yesu Klisto. Amen.

⁸⁶ Nkolo apambola bino mingi. Nakobenga bato na etumbelo te, na ngonga oyo. Nakotika ete bino moko bozona. Nakanisi ete, mbala mingi, kobenga bato na etumbelo... Ngai mpe nandimaka yango. “Kasi baoyo nyonso bandimaki, babatisamaki.” Ezali bongo: “Baoyo nyonso bandimelaki Ye.” Tolingi kobondela mpo na babeli.

⁸⁷ Nakokaki koloba awa butu mobimba. Bozali eyanganelo moko kitoko. Kasi oyo nalobi, nazali kaka moto; kasi soki nalobi Maloba na Ye, na bongo, ezali maloba na ngai te, ezali Maloba na Ye. Soki nalobi likambo moko, kasi Nzambe akokisi yango te, na bongo, ezalaki liloba na ngai. Soki nalobi Liloba na Ye, mpe Akokisi Yango, mosumuki nini yango, mobali to mwasi, elenge mobali to elenge mwasi, oyo kokende mpe koloba ete Ezalaki bongo te?

⁸⁸ Yesu, ntango Asalaki makambo yango, balobaki: “Moto oyo azali moto na solóka. Azali molimo mabe!” Moto na solóka, moto nyonso ayebi ete soloka ezali ya zabolo. Alobaki: “Azali moto na solóka.” Kasi bosilá komona moto na solóka koteya Nsango-malamu? Bosilá komona moto na solóka kobengana milimo mabe? Te, ata moke te, basalaka yango te.

⁸⁹ Alobaki: “Sikawa, Ngai Mwana na moto nakolimbisa bino mpo na likambo yango. Kasi ntango Molimo Mosanto akoya, kotelemela Yango ekolimbisama ata moke te na ekeke oyo to na ekeke ekoya, mpo ezali kobenga mosala ya Nzambe molimo ya mbindo.”

⁹⁰ Nzambe áyokela biso mawa, na mpokwa oyo, mpe nabondeli ete Nzambe ákita mpe ákokisa Liloba oyo liboso na bino.

⁹¹ Ndeko mobali, ndeko mwasi, ezali likambo ya elimo na ngai. Nasengeli kokutana na Nzambe. Nazali na mokumba ya makambo oyo nalobaka na bino. Nzambe akotángela ngai mokumba yango. Ya solo. Ekosunga ngai na nini, kotelema awa mpe koloba makambo yango, soki nayebi ete nazali kokweisa molimo na ngai na lifelo?

⁹² “Nzela mosusu emonanaka malamau mpo na moto, kasi nsuka na yango ezali banzela ya kufa.” Nzambe azalaka na ntina ya molimboli te. Ndenge nalobaki, Alimbolaka Liloba na Ye Moko.

⁹³ “Momboto ya Abraham akobótola ekuke ya monguna.” Bondimi yango?

⁹⁴ Soki nakokaki kobikisa yo, nalingaki kosala yango. Klisto asílá kobikisa yo. Likambo kaka moko, yo nde osimbi fungóla na loboko na yo. Fungóla yango ezali kondima na yo, mpo na kosimba yango. Bófungola yango, na mpokwa oyo, boye te? Wana Ayei katikati na biso, Molóngi na Nguya oyo alóngaki bokono nyonso, Ayei awa mpo na kolakisa bino ete Asílá kosala yango, mpo Azali Liloba kino lelo. “Mpe Liloba esósolaka makanisi oyo ezali na kati ya motema.”

⁹⁵ Ezali kálati ya mabondeli nini? B, moko kino. . . Tobandaki na nini, lobi na mpokwa? [Moto moko alobi: “Moko.”—Mok.] Tóbanda na ntuku mitano. Nani azali na kálati ya mabondeli B, ntuku mitano? Tombola loboko. Kálati ya mabondeli B. Tobandaki na moko, na mpokwa mosusu wana, lelo tokobanda longwa na ntuku mitano, na mpokwa oyo.

⁹⁶ Nani azali na B, B, ntuku mitano? Tombola loboko. Kalati ya mabondeli B, ntuku mitano. Bolingi koloba ete ezali awa te? Yo ozali na yango? Malamu, B, ntuku mitano. B, ntuku mitano na moko, nani azali na yango? B, ntuku mitano na moko, malamumu. B, ntuku mitano na mibale, nani azali na B, ntuku mitano na mibale? Malamu, yo moto ozali na yango. B, ntuku mitano na misato, ntuku mitano na minei, bóya kino awa. Ntuku mitano na minei, ntuku mitano na mitano.

⁹⁷ Mwana na ngai ya mobali moto ayaka awa, liboso ngai náková, mpe asangisaka ba-kálati yango. Mpe bozali komona ndenge bazali, moko *awa* mpe mosusu *kuna*? Bayebi te. Okoki koya na molongo *oyo* mpo na kozua kálati moko, moto oyo alandi akoki kozua motángo ya zomi, mosusu azui ntuku mibale na mitano. Toyebaka epai ezali te, kasi, ata ezali wapi.

⁹⁸ Sikawa, tobengi bato boni? Mitano, minei? B, ntuku mitano. Ezalaki B, ntuku mitano, boye te? [Moto moko alobi: “Iyo.”—Mok.] B, ntuku mitano kino ntuku mitano na mitano. Ntuku mitano na motoba, ntuku mitano na nsambo, ntuku mitano na mwambe, ntuku mitano na libwa, ntuku mitano na libwa, ntuku mitano na libwa, ntuku mitano na libwa. Sikawa, totala naino, moko, mibale. . . Tángá bango, Billy, bongo tó. . . Ntuku mitano, ntuku nsambo, bátelema naino, soki bokolinga. B, ntuku mitano kino ntuku nsambo, ntuku nsambo na mitano. Tángá bango, Ndeko Roy, nasengi yo, wana ngai nazali kosolola na eyanganelo.

⁹⁹ Bato boni kuna sikawa, wana bozali kotala epai boye, bozali na kálati ya mabondeli te?

¹⁰⁰ Bómikanisela, Yesu alobaki: “Misala oyo Nazali kosala, bino mpe bokosala yango.” Ezali solo? Ezali solo. Bondimi yango? Momboto ya Abraham elobaki bongo.

¹⁰¹ Biblia elobi ete: “Azali Nganganzambe Mokonzi.” Baebale, mokapo ya 4: “Azali Nganganzambe Mokonzi oyo akoki kokabola mpasi ya bolembu na biso.” Bondimi yango? Soki Azali ndenge moko lobi, lelo, mpe libela, Akosala yango ndenge nini?

¹⁰² Mwasi moko, na Biblia, wana bozali koyoka malamumu likambo nazali koloba. Mwasi moko, na Biblia, ntango mosusu azalaki na kálati ya mabondeli te; kasi alobaki na motema na ye: “Soki nakoki kosimba Mobali wana, nandimeli Ye.” Asilisaki mbongo nyonso azalaki na yango na mongang-. . . na minganga. Bakokaki kosunga ye te. Bokono na ye elekaki makasi. Bakokaki kosunga ye te. Kasi andimaki ete Nzambe akokaki kosunga ye. Mpe asimbaki songe ya elamba na Ye, ya elamba na Ye.

¹⁰³ Mpe Alobaki: “Namoni ete nguya ebimi na kati na Ngai.” Boye te?

¹⁰⁴ Bondimi ete Azali ndenge moko na mpokwa oyo? Bondimi ete Azali awa? Bato boni bandimi ete Asekwaki na bakufi? Sikawa ndenge nini bokoki kotalisa polele ete Asekwaki na bakufi?

¹⁰⁵ Eleki ntango molai te, moto na lokumu moko ya Batiste ayaki epai na ngai, mpe alobaki: “Ndeko Branham, Mizilmá moko alóngaki—alongaki ngai, mokolo moko, ntango atunaki ngai bongo. Alobaki: ‘Soki Asekwaki, Alakaki ete Akosala ndenge moko. Tómona Ye kosala yango.’” Bomoni, bango bandimaka ete Asekwaki te.

¹⁰⁶ Kasi biso tondimaka mpenza ete Asalaka yango. Tondimaka ete Asékwa na bakufi. Ezali na religion mosusu te na mokili, oyo ekoki kotalisa polele ete mobandisi na bango azali na bomoi, longola kaka Boklisto. Mpe nzela kaka moko mpo Nzambe ákokisa Yango, ezali na nzela na baoyo bandimi Yango, mpo nzela kaka moko mpo Nzambe ákokisa Maloba na Ye, ezali na nzela na baoyo bandimi Yango.

¹⁰⁷ Sikawa, wana bazali kosala mwa molongo ya mabondeli yango awa, nayebi te bato bomi oyo tokobenga, Nalingi ete moko na moko na bino, bózala esika bozali, bóbatela esika na bino, bótabola-tambola te, bótaba epai boye mpe bóbondela, bóloba: “Nkolo Yesu, nandimi.”

¹⁰⁸ Bómikanisela, Ayebisaki ngai: “Soki osali ete bato bándimela yo; na nsima, zala sembo ntango ozali kobondela.” Ezali kosalema na ekólo oyo mobimba, kokende kozonga, ekokisi mibu zomi na mitano, ekweya ata mbala moko te. Ekoki kokweya te.

¹⁰⁹ Nzambe, eloko bobele moko oyo Nzambe akoki kosala te, ezali kokweya. Asengeli kokokisa Liloba na Ye. Nandimi yango. Nandimi yango kaka ndenge na . . . koleka ndenge nandimi ete natelemi awa, koleka ndenge nandimi ete nazali na kati ya ndako oyo; oyo ekoki kozala eloko ya lokuta, ekoki kozala ndoto. Na elimo na ngai, nayebi ete Yesu Klisto, Mwana na Nzambe, azali na bomoi. Mpe lokola bino bozali Momboto ya Abraham, lokola bokufi kati na Klisto, bozali Momboto ya Abraham.

¹¹⁰ Sikawa, batiaki mwa miswále awa. Elonga monene ezali kozuama na nzela na yango, epai ya bato oyo bandimi. Sikawa

tógumba mitó, wana bazali komilengela, mpe tóbondela mpo na miswále oyo.

¹¹¹ Tata na Likoló, toteyami na Biblia, mpe ezali na bato awa oyo bandimaka ete Liloba moko na moko oyo Olobaki ezali Solo. Nkolo, mbala mosusu batengakatengaka mpe batindikaka fungola na monoko na yango, balekaka pembeni na yango mpe bangulutaka yango, kasi bandimaka ete ezali wana. Tika ete bákoba kotindika, bakomona yango, mpo ezali wana. Mpe fungóla yango ezali fungóla oyo esengeli: “Soki okoki kondima, nyonso ekoki kosalema.” Ndenge loyembo oyo ezali koyembama sikawa, to kobetama.

¹¹² Na Biblia elobami ete: “Polo azalaki kozua misuwále mpe biteni ya bilamba oyo esilaki komama nzoto na ye, mpe azalaki kotinda yango epai ya babeli mpe bato na mawa, ná milimo mabe ezalaki kotika bato, mpe bazalaki kobika.”

¹¹³ Sikawa, Nkolo, toyebi ete Santu Polo azali elongo na Yo. Kasi, ezalaki ye te; ezalaki Yo, Nkolo, Klisto kati na ye. “Ngai nazali kobika te, kasi Klisto nde azali na bomoi kati na ngai,” alobaki bongo.

¹¹⁴ Sikawa na ekeke oyo, Ozali Klisto kino lelo, ndenge ozalaki lobi. Mpe wana nazali kobondela mpo na miswále oyo mpe namami yango, nabondeli ete Ólonga banguna nyonso. Pesa bango kondima, mpo báyebe ete monguna asíli kolóngama.

¹¹⁵ Mpe mokolo moko, Mbu Motane, ndenge touti kolobela yango, ekabolaki Yisraele ná elaka, kasi bazalaki kosala mosala na bango. Mpe mokomi moko alobaki ete: “Nzambe atalaki yango na miso ya nkanda, na nzela na Likonzi na Móto wana, mbu ebangaki, efungolaki bikuke na yango, mpe bakatisaki.”

¹¹⁶ Kitisa miso, na mpokwa oyo, na nzela na Makila na Yesu Klisto. Mpe tika ete, ntango miswále oyo ekotiamama likoló na babeli, tika ete monguna ámona kondima na biso, na mpokwa oyo, wana tozali kobondela libondeli ya kondima oyo mpo na bango. Mpe tika ete mobeli moko na moko ábika, na Nkombo na Yesu Klisto. Amen.

¹¹⁷ Sikawa nalingi ete bóyoka ngai na bokebi nyonso. Moto oyo azali kotala likambo ya micro oyo ábakisa makasi na yango. Mpamba te, soki Molimo Mosanto asengeli kosala yango... Nalobi te ete Akosala yango.

¹¹⁸ Sikawa moto nyonso oyo akoya koyebisa bino ete azali na nguya ya kobikisa babeli, bóndima yango te. Nguya nyonso ezali kati na Klisto. Ye nde Molóngi, yo ná ngai te. Bisó tondimi kaka oyo Ye asíli kosala. Moto moko te azali na nguya ya kobikisa molimo to nzoto ya moto.

¹¹⁹ Mpo na moto nyonso na mokili, ntalo esilá kofutama. Lisengisi esilá kofutama. Esalemaki ndenge nini? “Azokisamaki mpo na masumu na biso, na mapipi na Ye biso tobikisamaki.”

Lobiko ya—ya nzoto na yo esilá kofutama. Lobiko ya molimo na yo esilá kofutama. Ozali na kondima mpo na koya, kondima yango? Esili. Soki ozali Momboto ya Abraham, ozali na yango. Nzambe alakaki yango. Eloko moko ezali kati na yo, oyo elobaka ete ezali wana, mpe ezali bongo.

¹²⁰ Sikawa likabo ezali nini? Likabo ezali nde kokende kobikisa bato? Te. Likabo ezali komilongola na nzela, mpo Nzambe ákoka kosalela yo.

¹²¹ Sikawa Alakaki yango, elembo ya nsuka, kokokana na Yesu Klisto, “Ndenge ezalaki na mikolo ya Sodoma, liboso épela móto.” Liboso makambo mosusu ésalema te, liboso Lota áteya Nsango-malamu, mpe bongo na bongo; wana te. Kasi liboso épela móto, Nzambe akitaki na lolenge ya moto, mpe afandaki elongo na Lingomba eponami, Abraham ná etóngá na ye, baoyo bazalaki na elaka.

¹²² Sikawa bómikanisela, kaka Momboto ya Abraham nde bandimaka yango. “Nsima na ntango moke, mokili ekomona Ngai lisusu te,” ndenge Yesu alobaki. “Bino bokomona Ngai, mpo Nakozala elongo na bino, kati na bino, kino na nsuka ya mokili.”

¹²³ Kasi Alakaki ete liboso mpenza Ázonga: “Ndenge ezalaki na Sodoma,” bótala oyo Sodoma ezali kozua; bótala oyo Lingomba liponami ezali kozua, Alobaki, “ekozala mpe bongo na boyei ya Mwana na moto.” Nzambe amitalisaki na lolenge ya moto oyo Apesaki mokongo na hema, mpe Alobaki oyo Sara asálaki na kati ya hema. Bato nyonso oyo bayebi ete ezali Solo, bótombola maboko. Ezali mpenza bongo. Sikawa Alakaki yango. Tokómi na ntango ya nsuka. Sikawa bómikanisela, wana ezalaki likambo ya nsuka oyo esalemaki; mpe mokili ya Mabota etumbamaki, Sodoma, mpe mwana ya elaka atalisamaki. Tozali kozela Mwana na elaka, Mwana na Nzambe.

¹²⁴ Biso oyo. Tika ete Nzambe áfungola miso na bino. Nayebi eloko mosusu ya koloba te. Tika ete Áfungola miso na bino.

¹²⁵ Sikawa Tata na Likoló, nazali ata na makoki te, nazali liboke ya potopoto oyo Obongisaki mpe Otiaki yango awa. E Nzambe, na mpokwa oyo, tika ete názua litomba ya ngolu mpe ya Bozali na Yo, ete ezala ete Ókoka kosalela mwa maboke ya potopóto oyo Osangisi awa. Ete, Nkolo, baoyo Obéngá na Bomoi na Seko, ntango mosusu bandimi naino Yango te, tika ete bámona bilaka oyo. Ntango mosusu batéyá bango ete ezalaki mpo na ntango ya kala, kasi ekomami awa na Biblia. Kokisa Yango, Nkolo. Yango nde ndimbola na Yo Moko. Ezali na ntina ya ndimbola mosusu te. Soki Okokisi yango, na bongo bakomona ete Liloba ezali solo. Sala yango, Tata. Tomipesi epai na Yo.

¹²⁶ Tika ete moto nyonso oyo azali awa, Nkolo, ásalela kondima na ye, na mpokwa oyo. Tika ete mondimi nyonso ya Libota ya Abraham, na nzela na Yesu Klisto, ázala na kondima, na mpokwa

oyo, mpe áyamba Bozali na Yo. Mpe tokopesa Yo masanzoli. Amen.

¹²⁷ Sikawa, oyo nde ya nsuk-. . . Sikawa, oyo ezali ndenge. Nalingi ete bósunga ngai sikawa, bóbondela mpo na ngai. Bófanda mpenza kimia, bótambola-tambola te. Bófanda kimia, bóbondela.

¹²⁸ Sikawa, bomoni, ezali kobóngwana longwa na bopalanganisi Nsango-malamu, kino na komipémisa na lolenge ete Molimo ya Nzambe ékoka komema yo mobimba na mosanda mosusu.

¹²⁹ Sikawa, mwasi moko ateleme awa. . . Pusana awa mwa moke, madame. Mpe. . . Kino wana, mpo nákende mosika na micro oyo te. Bomoni, nayebi te oyo ekosalema, bomoni, na bongo mbala mosusu, boyebi. . . Sikawa nzela bobele moko mpo náyeba yango, ezali—ezali na nzela na micro, bomoni, mpe bazali komeka kotia yango na bande kuna, mpe nayebi te oyo ekosalema.

¹³⁰ Sikawa ngai na yo toyebani te. Ngai nayebi yo te, namóná yo naino te na bomoi na ngai. Kasi ozali élenge mingi koleka ngai. Mpe ntango mosusu ntaka molai ekaboli bisika tobotámá, mpe mibu mingi ekaboli kobotama na biso. Oyo nde mbala ya liboso oyo tokutani. Boye te? Soki ezali bongo, tombola loboko mpo bato bámona. Sikawa, azali bobele mwasi oyo ateleme awa.

¹³¹ Bótala, bózongisa yango na Makomi. Tózua Santu Yoane 4. Moko na moko na bino bótánga yango ntango bokozonga na bandako. Ezali te—ezali te ete mwasi oyo azali mwasi ya lolenge wana; nayebi te. Mpe boyebi ete ngai nazali Yesu Klisto te. Kasi Azali awa. Ezali Ye. Sikawa epakweli ya Molimo na Ye likoló na biso ekoki komonisa mpasi na ye, ndenge Asalaki mpo na mwasi wana na libulu ya mai. Ndenge moko.

¹³² Mpe, mpo na yango, banganzambe ná bakambi ya eleko wana bazalaki koloba: “Mobali oyo azali moto na solóka, to molimo mabe, Belezebula.”

¹³³ Mwasi yango alobaki: “Mesie, namoni ete Ozali mosakoli. Toyebi ete Masiya akoya, mpe yango nde ekozala elembo na Ye.”

¹³⁴ Sikawa, bato boni bayebi ete ezali solo? Ee, soki Azali ndenge moko lobi, lelo, mpe libela, yango ekozala elembo na Ye na mpokwa oyo te? Alakaki ete ekosalema liboso na nsuka ya ntango? Sikawa bótala soki Akokokisa elaka na Ye mpo na Momboto ya Abraham.

¹³⁵ Sikawa, soki moto moko awa akanisi ete ezali lokuta, yo yaka kosala ndenge moko awa. Soki te, na bongo koloba eloko moko te mpo na yango. Eleki malamumu mpo na yo.

¹³⁶ Sikawa, na Nkombo na Klisto, nazui molimo nyonso na nsé ya bokonzi na ngai, mpo na nkembo mpe lokumu ya Nzambe.

137 Nakosengela nde kosolola na yo mwa moke, mama moke. Boyebi, Nkolo na biso asololaki na mwasi wana na libulu ya mai. Alobaki: “Yela Ngai mai ya komela.” Azalaki kosala nini?

138 Sikawa bótala malamau, Alobaki, na Santu Yoane 5: “Solo, solo, Nalobi na bino, Mwana,” wana ezalaki Ye, nzoto, “Nakoki kosala eloko moko te na Ngai moko,” bobele ndenge Amoni Tata kosala. “Oyo Tata asalaka, Alakisaka yango na Mwana. Bomoni, Nakoki kosala eloko moko te na Ngai moko, bobele oyo Namoni Tata kosala.” Na bongo, Yesu atikálá kosala ekamwiseli moko te kino liboso Nzambe alakisaki Ye yango na emononeli; ezalaki te ayebisaki Ye yango na litoi, kasi alakisaki Ye nde. “Oyo Namoni,” oyo Nayoki te, “oyo Namoni Tata kosala.” Yango nde esalaki ete Ázala Mosakoli lokola Mose, ndenge Mose alobáká. Sikawa ntango A—Azalaki koyeba ete Tata . . . Azalaki na . . .

139 Azalaki kokende na Yeliko, kasi Asengelaki koleka na Samalia, mpe Akómaki na engumba ya Sychar. Sikawa bomoni, Basamalia bazalaki kozela Masiya.

140 Bayuda bazalaki kozela yango, mpe Atalisaki bango elembo na Ye. Filipino, Natanaele, Petelo, kaka ntango elembo yango esalemaki, balobaki: “Ozali Mwana na Nzambe.”

Rabi alobaki: “Mobali oyo azali Bezezebula.”

141 Kasi sikawa bomikanisela, bato ya Mabota, biso, tozalaki ba-Anglo-Saxon, to—tozalaki kozela Masiya te. Tozalaki bapagano, Baroma, mpe bongo na bongo. Tozalaki kozela Masiya te. Ayaka kaka epai na baoyo bazelaka Ye.

142 Kasi Basamalia bazalaki kozela Ye, na bongo Asengelaki kolekela epai na bango, na nzela na Samalia. Afandaki na libulu ya mai. Elenge mwasi moko, ntango mosusu ya mibu na yo, ayaki wana. Azalaki mwasi ya bomoi mabe. Osila kotánga lisolo yango, nabanzi. Mpe Alobaki: “Mwasi, yela Ngai mai ya komela.”

143 Alobaki: “Oh, ezali momesano te mpo na Yo, Moyuda, ósenga Mosamalia eloko ya boye.”

144 Alobaki: “Kasi soki óyebaka Moto oyo ozali kosolola na ye, mbele yo nde olingaki kosenga Ngai mai.”

145 Lisolo ekóbaki. Sukasuka, Amonaki epai mpasi na ye ezalaki. Bozali komikanisela oyo yango ezalaki? Azalaki na mibali ebele. Alobaki: “Kende kozua mobali na yo, bóya awa.”

Alobaki: “Nazali na mobali te.”

146 Alobaki: “Olobi malamau,” Alobaki, “mpo ozalaki na bango mitano, mpe oyo ozali kobika na ye sikawa azali ya yo te.”

147 Alobaki: “Misie, namoni ete Ozali mosakoli. Toyebi ete Masiya akoya, Akoyebisa biso makambo oyo.”

Mpe Alobaki: “Nazali Ye.”

148 Atikaki mbeki na ye, apotaki mbangu kino na engumba, mpe alobaki: “Bóya kotala Mobali Oyo ayebisi ngai makambo

nasalaki. Oyo nde Masiya te?” Bazalaki na mosakoli te mibu nkama na nkama. Mpe Mobali moko ayaki wana, alobaki ete Ye nde Masiya, mpe atalisaki polele ete Azali mo—mosakoli, mpe atalisaki elembo ya Masiya.

¹⁴⁹ Ekosala ete óndima ndenge moko, soki Asalaki ndenge moko, lokola Azali ndenge moko lobi, lelo, mpe libela, mpe Alakaki na Makomi oyo ete Akosala yango?

Ekosala ete eyanganelo bándima?

¹⁵⁰ Ozali na bokono ya ba-rein. Soki ezali bongo, tómbola loboko.

¹⁵¹ Mpo na nini ezali ntango nyonso kozongela ngai? Moto moko alobi: “Nabanzaki yango kobanza.” Nabanzaki yango ata moke te.

¹⁵² Tala, azali mwasi malamú. Ondimeli ngai? Sikawa oyebi ete nabanzaki yango ata moke te. Tika ete náloba eloko mosusu. Mobali na yo azali elongo na yo. Ye mpe azali na bokono. Boye te? Na mokuwa ya mokongo. Ezali ya solo. Boye te? Boyaki ná mwana moko ya mobali. Ye mpe azali na bokono. Bolingi ete tóbondela mpo na ye. Eloko moko ezali kotambola malamú te na miso na ye. Ezali ya solo. Bozali na mwana moko ya mwasi, azali na bokono ya ba-rein, lokola yo. Boye te? Sikawa bino nyonso bokoki kobika, soki ondimi. Ondimi yango? Nzambe ápambola yo. Kende liboso mpe bikisama.

¹⁵³ Bondimi? Azali ndenge moko lobi, lelo, mpe libela. Ezali nini? Azali koluka kosala nini? Epai na bino, Momboto ya Abraham, Azali kolakisa bino ete Akúfi te. Ngai nakoki kosala makambo yango te. Akúfi te. Kasi Azali na bomoi, kolakisáká yo ete ozali na makoki ya kobotola bikuke ya monguna na yo. Yango nde esengeli kokata likambo.

¹⁵⁴ Madame oyo, yaka boye, mwa ngonga moke. Tozali penepene na mibu moko, nabanzi. Kasi ngai na yo to—toyebani te, na boyebi na ngai. Nayebi yo te, mpe toyebani te. Nayebi eloko moko te na ntina na yo. Soki ezali bongo, tombola loboko, bomoni. [Ndeko mwasi alobi: “Ezali bongo.”—Mok.] Moko na bango nde apesi yo kálati ya mabondeli, mpe yo oyo. Malamú. Sikawa soki Nkolo Yesu. . .

¹⁵⁵ Soki ngai, ntango mosusu, ndakisa, nameki kozua esika ya Ndeko Oral Roberts, to ya moko na bato minene ya kondima, nalingaki koloba: “Madame, mpasi na yo ezali nini?”

¹⁵⁶ Olingaki koloba: “Ee, nazali na mpasi *boye*.” Sikawa, moto yango akoki komikosa. Bomoni? Nayebi te. Bomoni? Kasi, moto yango, okoki koyebisa ye mpasi na yo.

¹⁵⁷ Akotiela yo maboko, koloba: “Nzambe atíndá ngai mpo—mpo nábondela mpo na babeli. Ondimi yango?” “Iyo.” “Nkembo na Nzambe! Kende, ndima yango.”

158 Ezali malamumu. Ezali malamumu. Nzambe alakaki yango. Kasi, bomoni, biso tozali kobika mwa moke likoló na—na yango, lelo. Yesu alakaki ete: “Ndenge ezalaki na mikolo ya Sodoma. Misala oyo Nazali kosala, bino mpe bokosala yango.”

159 Sikawa, soki Nzambe ayebisi ngai oyo yo ozali, yo okoyeba soki ezali solo to te, Akoki koyebisa yo oyo okozala, mpe soki ezali solo, oyo mpe ekozala solo.

160 Soki Ayebisi yo, ata nini, nayebi te, kasi soki Ayebisi ngai mpasi na yo, bino na eyanganelo mpe bokondima yango?

161 Nasengeli mpenza kokata. Mbala moko wana, oyo moto wana azalaki awa eleki mwa ntango, esengelaki kondimisa yango. Yesu asalaki yango mbala moko mpamba. Atikálá kosala yango mbala moko lisusu te. Moto nyonso na Sychar andimaki yango, andimaki litatoli ya mwasi wana, ntango ayaki koyebisa bango yango, mpe azalaki mwasi ya bomoi mabe. Mwasi Moklisto moko auti kolongwa na etumbelo, na liboso na bino nyonso! Amen. Kasi lokola ntango ekómi mosika koleka ndenge tokanisi, tika ete Nkolo ákoba komitalisa polele, Ye Molóngi monene na Nguya, ete Momboto na Abraham. . . Kasi mpo na Abraham, Asalaki yango mbala moko mpo na Abraham; na nsima Abomaki yango, mpe asalaki yango lisusu. Abraham akobaki kondima Nzambe.

162 Ozali awa mpo na yo moko te. Ozali awa mpo na moto mosusu, mpe ezali mwasi moko. Azali ndeko na yo ya mwasi. Mpe mwasi yango azipami na elíngi ya liwa. Mpe azali na bokono ya—ya diabète. Mpe afandaka awa te. Afandaka na. . . Afandaka na Louisiane, na etúka moko ya poto-poto. Oyo. . . Mpe likambo mosusu yango oyo, mpo eyanganelo bákoka koyeba yango. Ozali na mwana mwasi moko, oyo azali kobela makasi, oyo azali na mposa ya koya na mayangani oyo, mpe azali na maládi ya ndeke. Ezali ya solo. Ezali ya solo. Boye te? Ondimi sikawa? [Ndeko mwasi alobi: “Iyo. Amen.”—Mok.] Soki ozali Momboto ya Abraham, ndima yango, kende liboso, mpe bika na Nkombo na Yesu Klisto.

163 Bondimi? Na ntembe te. Bómikanisela, ezali elaka na Ye. Alobaki ete Akosala yango. Akokisaka elaka na Ye.

164 Nsango nini? Yo na ngai toyebani te. Ngai nayebi yo te. Kasi Nzambe ayebi yo mpenza. Ondimi ete soki Nzambe amonisi ngai mpasi na yo, na bongo okoyeba ete esengeli kouta na nguya moko ya molimo. Sikawa, ekoki kouta bobele na makambo mibale, oyo bokoki kokanisa. Ntango esalemi, elekaka ndimbola nyonso, mpo ezali likambo monene. Mpe, lisusu, ezali likambo ya kokamwa; eloko moko, ee, oyo moto akoki kondima te, kasi ezali solo. Ezali likambo ya kokamwa. Sikawa oyebi yango, soki ezali solo to te, okoyeba soki Ayebisi yo solo.

165 Sikawa, Kobosana te, nayebi bino te. Esengeli kozala Moto mosusu, ngai te. Soki osali lokola Bafalisai, mpe balobaki: “Oh,

ezali molimo mabe,” na bongo okozua mbano wana. Soki ondimi ete ezali Klisto, okozua mbano na Ye. Ntina oyo ekoki kosala ete óndima yango, ezali mpo Alakaki yango mpo na lelo, mpe esalemi lisusu te, banda ntango wana kino lelo. Yango nde esali ete lelo ézala ntango ya nsuka.

¹⁶⁶ Moto moko azali kokoba komonana liboso na yo, ntango nyonso. Azali mobali, na suki ya pembe. Azali mobali na yo. Afandi wana. Azali koluka kondima lobiko ya nzoto na ye, azipami na elílingí ya cancer, ya tumeur, ya cancer. Ozali na bokono ya ba-rein, bokono ya vesicule biliaire. Nkombo na bino Misie ná Madame Little. Ezali bongo? [Ndeko mwasi alobi: “Iyo.”—Mok.] Ndima na motema na yo mobimba, mpe bika.

¹⁶⁷ “Olobi nkombo ya mobali, nkombo na bango?” Ee, na ntembe te. Yesu alobaki na Petelo te ete: “Nkombo na yo Simona, mwana na Yona”?

¹⁶⁸ Mobali moko ye oyo. Yo na ngai toyebani te, misie. Ngai nayebi yo te. Kasi ozali mobali, ndenge—ndenge Petelo akutanaki na Nkolo Yesu, biso tokutani. Ondimi ete nazali mosali na Ye? Ondimi ete oyo nauti koteya ezali solo? [Ndeko mobali alobi: “Iyo, misie. Nandimi, misie.”—Mok.] Soki okoki kondima yango! Ngai, soki nakokaki kosala eloko moko mpo na yo, nalingaki kosala yango, kasi nakoki kosala eloko moko te. Asilá kosala yango; ezali kaka eloko moko mpo na kosala ete óndima yango. Mpe, omoni, elingaki kozala ngai te. Soki ezalaki ngai, nalingaki—nalingaki kosala nyonso oyo nakokaki kosala mpo na yo. Kasi Apésá ngai likabo moko, namipemisaka kaka liboso na Ye, mpe Ye nde alobaka. Ondimi yango? [“Iyo.”]

¹⁶⁹ Bondimi yango, eyanganelo?

¹⁷⁰ Nazalaki na mposa ya komona mobali moko. Ozali na makambo mingi ezali kotambola malamau te epai na yo. Kasi moko na makambo yango ezali, ozali na tumeur na liso na yo ya mobali. Yango nde bokono na yo oyo eleki makasi. Likambo mosusu yango oyo, mwasi azali ntango nyonso komonana awa. Azali mwasi na yo. Ondimi ete Nzambe akoki koyebisa ngai mpasi na mwasi na yo, awa? Bokono na ye ezali na kati ya monoko na ye. Ezali mino na ye. Ezali bongo. Ondimi ete kaka Yesu yango moko, Oyo ayebaki nkombo ya Simona Petelo, akoki koyebisa nani yo ozali? [Ndeko mobali alobi: “Iyo.”—Mok.] Ekosala ete óndima mpenza? [“Iyo, misie.”] Ekosala bongo? [“Iyo.”] Oscar Barnes. [“Ezali bongo.”] Ezali bongo? Zonga na ndako na yo, mpe bika.

¹⁷¹ [Maloba mazangi na bande—Mok.]...oyebi ngai te. Ngai nayebi yo te, kasi Nzambe ayebi yo mpenza. Ondimi ete Azali na makoki ya koyebisa ngai mpasi na yo? Okondima yango na motema na yo mobimba? Mpasi na yo ezali na mongongo na yo, mpe na kati ya ntólo na yo awa. Mikuwa na—na yo ezali lisusu makasi te. Mikuwa na yo ekómi lokola polele, mpe esali

matutu na kati na yango. Ya solo. Ofandaka awa te. Ofandaka na—na engumba moko ezali na bilanga mingi ya malala zingazinga na yango. Ezali na kati ya lobwaku, bangomba ezali nsima na yango. Hôtel moko ezali kuna, nkombo na yango Antlers. Ezali San Bernardino. Ofandaka nde kuna. Zonga, Yesu Klisto akobikisa yo, soki ondimi yango.

172 Eloko bobele moko oyo ekoki kobikisa cancer, ezali Nzambe. Ondimi ete Akobikisa yo? [Ndeko mobali alobi: “Nandimi mpenza.”—Mok.] Ndimba yango! Kende, mpe tika ete Nkolo Nzambe ábikisa yo na mobimba.

173 Mikolo oyo ozalaki na motema likoló-likoló mak-. . . mingi, otungisami mingi. Mpo na motema likoló-likoló oyo, okómi na mpasi na likundu. Ozali kokoka komela bilei te; ezali kozongisa yango na monoko na yo. Acide moko etondi na kati ya monoko na yo. Na nsuka ya nsima ya nzanga, olembaka mingi ná nyonso wana. Ozali na mpota na kati ya líkundú na yo. Ondimi ete Yesu Klisto akoki koyebisa yo yango? [Ndeko mwasi alobi: “Iyo.”—Mok.] Kende kolia bilei na yo ya mpokwa, kasi. Ndimba na motema na yo mobimba, Yesu Klisto abikisi yo.

174 Nsango boni? Makambo mingi ezali kotambola malamumu te. Kasi moko na makambo oyo ozali kobanga, ezali ete okokóma ebósono mpo na arthrite. Kasi ondimi ete Nzambe akobikisa yo, ete Akobikisa yo na yango? [Ndeko mwasi alobi: “Iyo.”—Mok.]

175 Nkolo Yesu, nabondeli ete Ósala yango na ndeko na ngai ya mwasi. Pesa ye komona na ye. Longola ye maladi ya basi, mpe bikisa ye na arthrite, na Nkombo na Yesu. Amen.

176 Kende sikawa, na kondima. Akosala yango, mpe ekokóma malamumu. Kotia ntembe te, koba kaka kotambola, mpe ndima na motema na yo mobimba.

177 Bokono ya motema ezali eloko ya nsomo, kasi Klisto abikisaka motema. Ondimi yango? [Ndeko mwasi alobi: “Iyo.”—Mok.] Kende, ndima yango, mpe nyonso ekokokisama. Esili.

178 Ondimi ete okokóma ebosono? Te, ngai mpe nandimi yango te. Nakanisi ete ezali arthrite; elílingi wana kuna, oh, ezali cancer. Ondimi ete Akobikisa yango? [Ndeko mwasi alobi: “Iyo, nandimi.”—Mok.] Kende, ndima yango. Akobikisa yo.

179 Etungisi yo ntango molai, misisa ya makila na motema kokangama. Kasi ondimi ete ekosila, na mpokwa oyo? Kende, ndima yango, Yesu Klisto abikisi yo.

180 Oumeli na mwa mpasi, euti na mpasi ya basi, ntango molai. Lisusu, ozali, oyokaka mpasi mpo na kotelema na ntongo. Makolo na yo ekangamaka. Oyokaka mpasi mpo na kotambola na moi mobimba, tóloba. Ezali arthrite. Kende, kotia ntembe te, ekotungisa yo lisusu te. Ndimba yango kaka, na motema na yo mobimba.

181 Ozali na mpasi ebele, mikakatano. Kasi mpasi moko oyo ezali kotungisa yo mingi mpenza, yo mpe ozali kokanisa ete ezali arthrite, ezali mpenza yango, ebandi kokómisa yo ebosono. Ondimi ete Akotambwisa yo mpe Akobikisa yo? [Ndeko mwasi alobi: “Iyo, misie.”—Mok.] Kende, ndima yango na motema mobimba, Yesu Klisto akobikisa yo.

182 Motema likoló-likoló, ná arthrite, kasi ondimi ete Nzambe akobikisa yo? Ondimi? Kende, mpe tika ete Nkolo Yesu ábikisa yo.

183 Likundu yango etungisi yo mingi mpenza na mibu oyo euti koleka, boye te? Ekotungisa yo lisusu te. Kende, ndima yango. Nzambe ápambola yo. Bíká.

184 Yo mpe, likundu na yo ebikisami. Kende, ndima na motema na yo mobimba. Kotia ntembe te.

185 Oyokaka mpasi mpo na kopema, asthme yango elembisaka yo mingi, boye te? Ondimi ete ekokokisama sikawa? [Ndeko mobali alobi: “Iyo.”—Mok.] Malamu, kende mpe ndima yango. Amen.

186 Aleluya! Ondimi na motema na yo mobimba?

187 Zela mwa moke. Bozali komona Pole wana kuna te? Mwa mwasi moko ya moindo azali kotala ngai, afandi awa, azali na tumeur na mopanzi na ye ya mwasi. Azali na bokono ya ba-rein, mikakatano. Ozalaki na kondima mingi. Ozali na ntina ya koya liboso awa te. Esili. Ndima yango kaka. Amen. Ndimela Nzambe!

Ondimi yango?

188 Ondimi, ndeko mwasi, ete okobika na bokono wana ya mokuwa ya mokongo, yo oyo ofandi awa? Ondimi ete Akobikisa yo? Malamu. Kotia yango nde ntembe te, mpe okoki kozua yango, soki kaka ondimi yango.

189 Mobali oyo afandi awa, oyo azali kotala ngai, azali na bokono ya prostate, alamukaka na butu mpe nyonso wana. Ondimi, misie? Na bongo, ekosila, soki ondimi yango.

190 Mobali moko ya moindo afandi awa, azali kotala ngai. Azali na maladi ya ndeke. Azali mpe koluka libatizi ya Molimo Mosanto. Téléma, misie, yamba lobiko ya nzoto na yo. Tika ete Nzambe ápesa yo libatizi ya Molimo Mosanto. Amen.

191 Liboso na yo mpenza, mwana moko afandi wana, ye mpe azali na maladi ya ndeke, akweyaka mpe abungisaka makanisi, afandi wana, na ngámbo mosusu. Ondimi ete Nzambe akobikisa mwana yango, kuna? Ondimi na motema na yo mobimba? Na bongo, Nzambe akobikisa mwana yango.


192 Bondimi, bino nyonso? Ezali te—ezali te Ye—ezali te ete Ye nde Momboto Mokonzi ya Abraham? Ezali te Ye nde Molóngi na Nguya? Alakaki nde ete bokoki kobotola bikuke ya monguna?

¹⁹³ Bato boni kati na bino bakangámá, mpe bayokaka kobendama na monguna? Bótombola maboko, mpo na kotalisa ete boyokaka kobendama na monguna, mpe bozali Momboto ya Abraham, bótombola maboko *boye*. Loba: “Ndeko Branham, natungisamaka na motema likoló-likoló.” Oh, bato ntuku mwambe likoló na mokama kati na bino batungisamaka na yango. Bóloba, ngai. . .Ekómi mpenza monene sikawa, etonga mwimba ebandi kokóma na lángi lokola ya miliki mpenza, nazali lisusu komona malamú mpenza te, kuna, esika bozali.

¹⁹⁴ Bozali komona te ete awa, babeli ntuku mibale to ntuku misato, ntango mosusu, to koleka, awa na etumbelo oyo mpe na kati ya eyanganelo, etalisi ete Nzambe akweyaka te? Ezali Yesu Klisto ndenge moko lobi, lelo, mpe libela. Bondimi yango? [Losambo balobi: “Amen.”—Mok.] Bongo mpo na nini te, Momboto nyonso ya Abraham, mpo na nini bózua fungóla te sikawa? Molóngi monene, oyo alóngaki yango mpo na bino, azali awa. Atalisi polele ete Azali awa. Bondimeli Ye?

¹⁹⁵ Na bongo, zua fungóla na yo ya kondima, sembola loboko, mpe loba: “Yesu Klisto, nandimi mpo na lobiko ya nzoto na ngai, sikawa.” Telema. Tombola loboko, fungola kondima na yo sikawa. “Nandimi, Nkolo Yesu. Nandimi sikawa.”

¹⁹⁶ Sikawa bótia maboko bamoko likoló na bamosusu. Bótia maboko bamoko likoló na bamosusu, likoló na Momboto mosusu ya Abraham. Sikawa bondela mpo na moto yango. Tiela ye maboko. Yesu alobaki: “Bilembo oyo ekolanda baoyo bakondima. Soki batieli babeli maboko, bakobika.”

¹⁹⁷ Satana, olongami na etumba. Na Nkombo na Yesu Klisto, bima awa, mpe tika bato oyo bákende, mpo na nkembo na Nzambe. 

64-0207 Nkóko Abraham
Foires Ya Kern County
Bakersfield, California U.S.A.

LINGALA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org